

GOBIERNO MESTER MANEHA SETAR CU MAN DURO



ORANJESTAD(AAN): Ministro Glenbert Croes no por bay baha cabez pa manipulacion cu ta tumando lugar den Setar, pasobra awor mas cu nunca gobierno mester cumenza maneha Setar cu man duro.

Henter e asunto di Fabela cu a pone STT y otro politiconan muestra nan cara berdadero y tambe muestra con facil ta pa manipula y perhudica Setar y e puelo di

Aruba, a duna gobierno un signal bon cla, cu mester maneha Setar cu man duro.

Setar mester haya un director cu weso di lomba cu no ta tolera cu un compania asina valioso pa e economia y futuro di e pais Aruba, por worde manipula pa metanan politico door di un grupito.

Tempo cu STT a tene su accionnan, e director interino Nicolaas a haci manera cu su nanishi tabata sangra y cu ta bril di palo e tabata tin bisti.

No ta Nicolaas so a permiti STT tuma poder grandi den Setar y asina para telecomunicacion cu a perhudica comercio y e pueblo di Aruba, pasobra tabata tin mas hefe den Setar cu tambe a participa den e wega grandi bao di e capa di huma di Fabela.

Trahadornan di Setar tabata tin tur derecho pa bringa pa nan pan di cada dia y si Fabela tabata un maneja grandi pa nan, anto ningun hende na Aruba lo tabata tin

algo contra accionnan contra Fabela, pero no por ta asina cu STT y su compinchinan por a haci manera cu Setar ta di nan.

Setar ta di e pueblo di Aruba y ta gobierno mester dicidi kico ta worde haci den Setar y ningun otro instancia o grupo cu interesnan politico o personal.

Señor Enrico Giel no tabata di acuerdo, cu gobierno no a acepta e proposicion pa haci señor Nicolaas director di Setar.

No ta señor Nicolaas so a worde presenta como candidato pa director di Setar pasobra dos Hulandes tambe a worde poni riba lista, siendo cu STT tabata grita cu un yui di tera mester bira director.

E posicion cu señor Nicolaas a tuma tur e tempo cu e tabata riba e stoel di director interino y e posicion cu su persona a tuma durante cu STT tabata hibando accion, a pone cu gobierno dificilmente por acepta su persona como director di Setar.

Cu awor señor Enrico Giel kier hunga un sorto di Power Play, door di entrega su retiro como Presidente di Hunta di Directiva di Setar y tambe sali di e partido OIA, ta duna e muestra cu mester tin otro influenciacion den wega.

Gobierno no mester baha cabez pa manipulacion y mester para firme den e caso di Setar.

Setar mester haya un director local y ta gobierno ta dicta kende ta bira director y no señor Enrico Giel.

Rumorman encuan to cu otro miembronan di Hunta di Directiva di Setar tambe lo tuma nan retiro, no mester pone gobierno cambia di disicion pasobra awor ta basta cu e wegan cu ta worde hunga den Setar.

Benny por a haci y deshaci den Setar y e pueblo por a nota esaki bon cla mescos cu trahadornan den Setar, cu mester a para wak con nan mes despues di hopi aña di trabao tabata worde pasa

door di hendenan cu a worde poni riba posicionnan den Setar sin cu nan tabata traha.

Esnan cu no por para firme den Setar su gerencia y den hunta di Directiva, mester hala un banda y laga yuinan di tera cu no ta baha cabez pa intimidacion y manipulacion politico tuma over, pa asina guia e compania den bon caminda.

Gobierno tin e obligacion y responsabilidad pa cu e compania Setar y ta pesey Ministro Glenbert Croes awor mas cu nunca, mester para firme y nombra un hende cu weso di lomba como director y no un Hulandes y tampoco Nicolas.

Ta mucho wega a worde hunga den Setar y e pueblo di Aruba ta harta di e situacion aki y mester bin un cambio pa asina tur hende (sigur cierto hendenan) den Setar, cumenza compronde cu nan mester haci nan trabao y stop di bruha tera pa asina privilegia un grupito so.